

偈勉齋吟詠選集

〔纏縛卷〕** 業緣牽繫，常在纏縛

纏縛

誰知萬劫我非真，流轉慾河自有因。
心色愛憐增繫縛，業緣糾葛成冤親。
歡場一霎等陽焰，風雅半生化影塵。
也向禪門求一悟，癡愚難醒夢中身。

蠅困

憂患元來在有身，滔滔欲海任浮沈。
刃邊舔蜜渾無狀，夢裡尋歡亦喪真。
空色高談終戲論，我人縛繫轉貪瞋。
悚然念及無常到，蠅困紙窗不出塵。

世間

大矣從來論死生，生生死死總無情。
世多嬴帝登仙夢，誰會莊生化蝶驚。
欣躍春辰迎嫩綠，遲回秋暮泣殘更。
世間如幻欲先覺，請聽如來獅吼聲。

溺情

滔滔情海浪千重，太上忘之我獨鍾。
花笑春風人面去，詩題紅葉墨香濃。
雨鈴不忍愁中聽，笑靨偏來夢裡從。
緣結三生成繫縛，人間何處不相逢。

愛塵

扶搖奮翅上天池，才染愛塵便折肢。
酒有別腸難買醉，心無羈索任相思。
英雄未老先心碎，覺岸不登悲路歧。
宿昔風流猶自命，而今痛悔半生癡。

塵勞

僕僕半生面撲塵，塵勞欲釋不知津。
世途乖舛迷詩酒，夢裡癡愚恣笑顰。
華髮暗滋增我執，綺懷盡蝕怯花新。
可憐到此難勘破，猶戀劫餘虛幻身。

浮生

浮生大夢夢迷離，鏡裡風霜上鬢絲。
憂患從來緣妄執，聰明到此轉愚癡。
雞群一鶴遭天忌，蝸角半生只自悲。
學步參禪渾不透，枕中驚覺日遲遲。

〔法喜卷〕**心無罣礙，法喜充滿

大塊

大塊載形勞我生，影塵競逐似蠅營。
二毛漸落歡情少，大夢猶酣貪愛萌。
欲向心田植種智，勤持經卷伴長更。
垂憐幸有法燈在，爲息塵勞現化城。

無常

人生真實唯當下，過未執迷總是癡。
春雨樓頭悲落蕊，紅顏鏡裡褪青絲。
二行難革心常縛，一息不存悔已遲。
欲出影塵窺慧日，無常究竟是吾師。

自在

生來根鈍不參禪，幸喜法門有萬千。
坐臥翻經真自在，唱吟念佛亦隨緣。
清心不受塵勞繫，憂惱元由妄執牽。
人我是非齊放下，欣看火焰現紅蓮。

清涼

當年自負任輕狂，蝶夢初驚鬢已霜。
悔恃斗才揮色筆，愧攀風雅論宮商。
幸親經教學安立，始懺癡貪知遜藏。
一句彌陀珠入水，身心無礙化清涼。

去縛

厚祿浮名不到庭，當窗箕坐展金經。
風傳春訊十分綠，螢舞野空一片星。
世愛讒譏宜笑置，心無繫縛豈勞形。
尋常歲月尋常過，雲在青天水在瓶。

相逢一笑泯恩仇

讀魯迅詩，於「相逢一笑泯恩仇」句爲之動容，賦此詩。

紛爭蝸角自成囚，千載賢愚歸亂丘。
黃金有價猶可市，熱血無緣爲誰酬。

報投青睞掏肝膽，鄙視榮華等泡瀾。
兄弟何須論寵辱，相逢一笑泯恩仇。

眾皆菩薩我凡夫

讀印光法師「看一切人都是菩薩，獨我一人實是凡夫」句，深受感動，賦此詩。

含靈蠢動性非殊，惱苦只緣著幻軀。
忍辱去瞋能妙覺，不輕執禮破癡愚。（註：忍辱仙人、常不輕菩薩）
塵中自性元清淨，懷裡誰家無寶珠。
慈眼偶開今始識，眾皆菩薩我凡夫！

賞詩

賞詩渾似學參禪，感動何須句萬千。
偶觸神機矜挂角，妙觀緣相道非玄。
冰心玉匣蓮生水，春草池塘雲在天。
洗盡影塵欣展卷，清風明月滿窗前。

禪心

愛河千尺浪，情海萬丈波。緣慳成怨憎，會聚歡愉多。
因緣每乖舛，長夜聞悲歌。愛箭未摧折，燈火引撲蛾。
神女惱襄王，春夢一南柯。禪心不沾絮，自在出網羅。

〔雜感卷〕**觸景生情，豈能無言

偕友碧潭飲茗

萬般詩興貯澄潭，共倚蘆棚仔細參。
懸岸擱舟空自蕩，長橋臥雨靜如酣。
教慚花筆負春色，強對清樽作雅談。
底日塵心更洗卻，重扶雙楫賞晴嵐。

落葉

突起新愁酒半醒，樽前何處是春榮。
渾忘春逝繁華歇，但見秋深落木橫。
身似孤桐留瘦影，世經大劫怯餘驚。
幾家漂泊同秋葉，忍聽敲窗打砌聲。

有懷

鎮日寂寥心未開，魚書難就愴心裁。
孤燈冷結愁千緒，夜雨暗侵腸九迴。

無限癡狂悲落寞，幾番離恨費疑猜。
今宵但願鶉鶉夢，爲帶多情笑靨來。

櫻花

紛爭綠意又千叉，紅影慣隨風日斜。
豈惜年華愛蝶舞，亂分春色向人家。
可憐光彩生芳畹，倏忽塵泥掩落花。
向晚卻尋搖曳處，殘枝空映半天霞。

贈別

來歲堤楊初發時，殷勤誰與折新枝。
臨春未喚春光駐，對雁徒嗟雁信遲。
酒入愁腸頻化淚，魂縈舊夢更堪悲。
人生不到銷魂處，那識相思與別離。

夜泛

橋影如籃柳似絲，清宵好是泛波時。
葦舟載月搖春碧，解得無聲絕妙詩。

晚步

晚涼閒步向南橋，風露侵衣酒半消。
遙對山燈飛逸興，靜聽蛙唱到深宵。

迍邅

莫嘆前路多迍邅，困辱之來增上緣。孫武既膺精兵陣，屈原被放著騷篇。
刺骨讀書思蘇子，蠶室論史懷馬遷。吞恨待時且蟄伏，一朝放鶴更冲天！

花心動 溪邊晚步有懷

山影幢幢，正相映，濛濛一溪煙月。楓冷露堤，雁唳遙天，共我寸心愁絕。
幾回幽徑徘徊久，念好夜，爲誰鋪設。佇望處，悽涼總似，去年時節。難
忘小亭雨歇。悵殘柳依依，輕送人別。私語短橋，弄笛苔磯，都化西風嗚咽。
天涯從此音塵隔，只魂夢，牽縈如結。甚情緒，今宵倩誰訴說。

漢宮春 贈賀友人生日

如夢年華，似芙蓉醉露，笑語盈盈。不辭撲香戲蝶，穿柳聽鶯。時攜彩筆，
趁薰風，寫繪新聲。留戀處，舞裳翩起，翻搖玉佩琤琤。懷想瑤台舊事，
對瓊樓暗冷，燭影淒清。縱憑爐煙漸暖，難耐長更。紅塵一夢，向人間，便換
平生。過眼裡，紛紅穠綠，都化無限春情。

陌上花 贈作

餘醺未醒，飛花先識，燕來時節。寂寞春心，又與柳魂爭發。碎紅暗綠尋思處，無奈愁腸縈結。欲因春問取，瓊枝瑤葉，肯容攀折。縱黃鸝有意，隨風密遞，萬種風情殷切。只恐春歸，花萼早託蜂蝶。負他百轉無人解，好夢還成傷別。況遲遲怯寄，幾番情索，又憑誰說。

念奴嬌 讀項羽本紀

虞姬騅馬，嘆風雲人物，堪哀如許。長記拔山氣蓋世，叱吒能呼風雨。萬里鷹揚，霸王帝夢，卻被蒼天妒。楚歌驚魄，欲還江右無路。懷想高宴鴻門，自雄顧盼，劍光流如炬。看那沛公渾失據，寒膽竄逃如鼠。一霎兵摧，東城身隕，勝敗歸天數。是非功過，瞬間都化塵土。

逍遙樂 秋懷

煙迷青嶂，日映丹楓，秋山似畫。一行征雁逐流霞，漂泊情懷亂似麻。望家園更在天涯。憑欄愁對，千疊危巒，幾點寒鴉。

最難風雨故人來

〔黃鐘出隊子〕寒風淒緊，更堪暮雨侵窗深閉門。寂寥唯是酒相親，落魄從來少故人，對燭不眠愁思忖。

〔刮地風〕嘆世途崎嶇多苦辛，天地恁廣不容身，算平生只有淒涼分。禿筆長寫送窮文，大才難遇封侯運，滿懷鬱紆憑誰論。思故人，憶舊親，總無音訊相聞問。世俗惡，雙眉顰，淡薄人情似秋雲。

〔么〕不信天道無親常與善人。嘆濁世營聚紛紛，把周遭冷暖都看盡。奈他富隱深山有遠親，貧居鬧市苦無鄰，倩誰識器相牽引。爭攀夤，競問津，世俗趨附沒憑準。有錢財，情義存，一朝失時便無恩。

〔人月圓〕君看羊左皆貧困，患難見情真。楚道分食，相期佩印，高義無倫。

〔么篇換頭〕而今潦倒，志高難伸。五內欲焚，倒顛方寸。交情友義，欲覓無因。

〔尾聲〕風雨淒淒乏故人，且向濁酒拚醺醺，更莫怨薄俗添瘦損。